

氏族典第七十七卷

吳姓部彙考

鄭樵通志

以國爲氏

周同姓國

吳氏吳今蘇州城是也太伯與弟仲雍皆周太王之子而季歷之兄也季歷有聖子昌太王欲立季歷以及昌故太伯仲雍相攜而奔荆蠻太伯號勾吾舊曰勾吾地名然吳有勾吾越曰勾踐皆是名號非謂地名勾者吳越之語辭也荆蠻之人義太伯從而歸之千餘家立以爲君長太伯卒無子仲雍立至武王克商求太伯仲雍之後得仲雍之曾孫周章已君吳矣從而封之爲吳子追封太伯爲吳伯又別封周章之弟虞仲於虞皆爲諸侯自太伯五世而得封十二世而晉滅虞虞滅而吳始大至壽夢而稱王其子季札求聘始見春秋自壽夢以上可知世數而不可紀年壽夢之元年魯成公之六年也夫差十五年獲麟之歲也二十三年魯哀公之二十二年也是年勾踐滅吳子孫以國爲氏季札避國子孫居齊魯之間

王應麟姓氏急就篇

吳氏

吳氏周太子太伯封吳其後爲氏舜後封虞虞吳音相近故舜後亦姓吳

廖用賢尙友錄 吳姓

吳延陵羽音又望出渤海濮陽

四川總志 氏族譜

吳氏入蜀以唐左武衛兵曹叅軍爲始祖四世孫襲僞蜀時最顯至衰六世矣仕宋朝至太子舍人贈都官員外郎七世孫季良第端拱二年進士至都官郎中贈中大夫九世孫師孟第進士官至左朝議大夫門望始大王安石當國謂師孟同年生也自鳳州別駕擢爲梓州路提舉常平倉兼農田水利差役事師孟疏力言法不便寧罷歸故官後知蜀州又論茶法害民繼謝事去蘇文忠公軾刺新法書有曰吳某乞免提舉如逃垢穢至言茶病民以矯矯六君子稱之師孟其一也子縝以世科官至左朝議大夫知卬蜀洋萬四州子景知漢州官至朝散大夫景之子璘始遷蜀州今重慶府惟師孟從兄弟師蓋三世猶居成都族最舊子孫亦蕃十世皆葬成都繪於寶曆寺凡數十人

滕縣志 人物

吳昇其先本女直吾古論氏世居臨洮乃以吾作吳因姓吳曾大父吳珍仕金爲滕陽軍判遂爲滕人

吳姓部列傳一

周 吳起

按史記吳起傳起衛人也好用兵嘗學於曾子事魯君齊人攻魯魯欲將起起娶齊女爲妻而魯疑之起於是遂殺其妻魯卒以爲將攻齊大破之魯人或惡吳起曰起之爲人猜忍人也起於是聞魏文侯賢欲事之文侯以爲將擊秦拔五城起爲將與士卒分勞苦卒有病疽者起爲吮之文侯以起善用兵乃以爲西河守魏文侯既卒起事其子武侯公叔爲相害起起懼得罪遂去之楚楚悼王素聞起賢至則相楚於是南平百越北并陳蔡却三晉西伐秦及悼王死宗室大臣作亂攻起起走之王尸而伏之擊起之徒因射刺吳起并中悼王太子立乃使令尹盡誅射起而中王尸者坐夷宗死者七十餘家

漢 吳芮

按漢書吳芮傳芮秦時番陽令也甚得江湖間民心號曰番君天下之叛秦也芮率越人舉兵以應諸侯沛公攻南陽遇芮之將梅鋗與偕攻析酈項羽以芮率百越佐諸侯從入關立芮爲衡山王都邾項籍死上以鎬從入關德芮徙爲長沙王都臨湘一年薨諡曰文王

吳廣

按漢書陳勝傳吳廣字叔陽夏人二世元年秋七月發閭左戍漁陽九百人勝廣皆爲屯長至蕪大兩道不通度已失期失期法斬乃謀殺兩尉召徒屬袒右稱大楚爲壇而盟勝自立爲將軍廣爲都尉入據陳勝立爲王號張楚以廣爲假王監諸將以西擊滎陽勝立寧陵君咎爲魏王周市爲相將軍田臧等相與謀矯陳王令以誅吳廣獻其首於勝

吳實

按尚友錄實字子景號綺里季隱商洛山四皓之一

吳臣

按漢書吳芮傳長沙王芮薨子成王臣嗣

吳淺

按漢書功臣表淺以父長沙王功封便侯三十年薨諡頃

吳陽

按漢書功臣表陽以父長沙王功封沅陵侯二十五年薨諡頃

吳郢

按漢書功臣表郢以長沙柱國封義陵侯七年薨

吳仲

按漢書功臣表孝惠四年義陵侯重嗣十年高后七年薨亡後

吳回

按漢書吳芮傳長沙成王臣薨子哀王回嗣

吳右

按漢書吳芮傳長沙哀王回薨子共王右嗣

吳公

按漢書賈誼傳誼年十八以能誦詩書屬文稱於郡中河南守吳公聞其秀材召置門下甚幸愛文帝初立聞河南守吳公治平爲天下第一故與李斯同邑而嘗學事焉徵以爲廷尉廷尉乃言誼年少頗通諸家之書文帝召以爲博士

吳福

按漢書功臣表孝文後二年沅陵頃侯福嗣十七年薨

吳羌

按漢書吳芮傳長沙共王右薨子靖王羌嗣孝文後七年薨無子國除

吳信

按漢書功臣表孝文侯七年便共侯信嗣七年薨

吳廣志

按漢書功臣表孝景六年便侯廣志嗣

吳周

按漢書功臣表孝景中五年哀侯周嗣薨亡後

吳千秋

按漢書功臣表便侯嗣元鼎五年坐酎金免

吳陽

按漢書功臣表陽以故東越衍侯佐繇王功元封元年封外石侯九年薨

吳首

按漢書功臣表太初四年外石侯首嗣十四年後二年坐祝詛上要斬

吳霸

按廣東通志霸字子公陽山人少才勇嘗禦侮至滇陽招徠流徙民感其仁旌所駐山曰吳山徙廣鬱都尉威震夜郎遷牂牁太守爲夜郎竹王立後天子從其請由是蠻裔畢服昭帝元鳳五年秋罷象郡分屬鬱林牂牁霸族在桂陽者欲往廣鬱就腴田霸不許惟令墾近土廬居番禺縣之西有江

浦爲民服其不私今吳氏布漢嶺表皆其後云

吳長樂

按漢書功臣表元康四年便頃侯淺元孫長陵上造長樂詔復家

吳章

按漢書儒林傳許商號其門人沛唐林子高爲德行平陵吳章偉君爲言語重泉王吉少音爲政事齊炔欽幼卿爲文學王莽時林吉爲九卿欽章爲博士章爲王莽所誅

吳剛

按酉陽雜俎月中有桂高五百丈下有一人常斫之樹創隨合其人姓吳名剛學仙有過謫令伐樹

按尙友錄吳剛漢西河人

吳雄

按尙友錄雄字季高河南人官廷尉少時家貧母死葬人所不封之地喪事促辦不卜日術者皆言當族滅而子祈孫恭三世爲廷尉

後漢 吳漢

按後漢書吳漢傳漢字子顏南陽宛人也家貧給事縣爲亭長王莽末以賓客犯法亡命至漁陽以販馬自業往來燕薊間所至皆交結豪傑更始立使使者韓鴻徇河北遂成制拜爲安樂令會王郎起北洲擾惑漢素聞光武長者乃說太守彭寵附光武於廣阿拜漢爲偏將軍賜號建策侯光武將發幽州兵拜漢大將軍持節北發十郡突騎光武北擊羣賊漢常將突騎五千爲軍鋒及河北平光武卽位拜爲大司馬更封舞陽侯建武二年漢擊檀鄉賊於鄴東大破之帝使使者璽書定封漢爲廣平侯復率諸將擊鄴西山賊及劫掠羣盜皆平之東方悉定振旅還京師會隗囂畔復遣漢西屯長安八年從車駕上隴圍隗囂於西城十一年伐公孫述漢八戰八剋斬述首傳送洛陽十五年北擊匈奴徙鴈門代郡上谷吏人六萬餘口置居庸常關以東十八年蜀郡守將史歆反於成都遣漢討之誅歆等而還漢性疆力能任職在朝斤斤謹質形於體貌二十年薨賜諡忠侯

吳河

按後漢書吳漢傳周建蘇茂出兵圍漢漢選四部精兵黃頭吳河等及烏桓突騎三千餘人齊鼓而

進建軍大潰

吳成

按後漢書吳漢傳漢封廣平侯薨子哀侯成嗣

吳國

按後漢書吳漢傳建武二十八年分封成弟國爲新蔡侯

吳旦

按後漢書吳漢傳建武二十八年分封成子旦爲灋陽侯

吳肝

按後漢書吳漢傳建武二十八年分封旦弟肝爲筑陽侯

吳良

按後漢書吳良傳良字大儀齊國臨淄人也初爲郡吏歲旦與掾吏入賀門下掾王望舉觴上壽諂稱太守功德良於下坐勃然進曰望佞邪之人欺諂無狀願勿受其觴太守歛容而止讌罷轉良爲

功曹耻以言受進終不肯謁時驛騎將軍東平王蒼辟爲西曹上疏薦良顯宗以爲議郎永平中左轉爲卽丘長後遷司徒長史每處大議輒據經典不希旨偶俗以微時譽後坐事免復拜議郎卒於官

吳匡

按風俗通弘農太守河內吳匡少服職事號爲敏達爲侍御史與長樂少府黃瓊共佐清河王

吳恢

按後漢書吳祐傳祐父恢南海太守

吳祐

按後漢書吳祐傳祐字季英陳留長垣人父恢爲南海太守祐年十二隨從到官恢欲殺青簡以寫經書祐諫曰昔馬援以薏苡興謗王陽以衣囊微名嫌疑之間誠先賢所慎也恢乃止撫其首曰吳氏世不乏季子矣及年二十喪父居無擔石而不受贍遺常牧豕於長垣澤中後舉孝廉祐以光祿四行遷膠東侯相政惟仁簡以身率物祐在膠東九年遷齊相大將軍梁冀表爲長史及冀誣奏太

尉李固祐聞而請見與冀爭之冀怒遂出祐爲河間相因自免歸家不復仕年九十八卒

吳鳳

按後漢書吳祐傳祐子鳳官至樂浪太守

吳愷

按後漢書吳祐傳祐子愷新息令

吳馮

按後漢書吳祐傳祐子鳳鳳子馮飼陽侯相

吳碭

按廣東通志碭字叔山揭陽人漢末察孝廉爲安成長孫權使呂岱出長沙郡碭據縣不從權遣魯肅攻圍碭突去曰碭受天子命爲長知有漢不知有吳也權後統有交廣遣步騭爲交州刺史亦議碭無嫌介言碭亦不仕

魏 吳質

按魏志王粲傳吳質濟陰人以文才爲文帝所善官至振威將軍假節都督河北諸軍事封列侯

吳普

按魏志華佗傳佗精方藥廣陵吳普從佗學依準佗治多所全濟普年九十餘耳目聰明齒牙完固

吳 吳範

按吳志吳範傳範字文則會稽上虞人以治歷數知風氣聞於郡中舉有道詣京都世亂不行會孫權起於東南範委身服事每有災祥輒推數言狀其術多效權以範爲騎都尉領太史令數從訪問欲知其決範祕惜其術不以至要語權權由是恨之初權爲將軍時範嘗白言江南有王氣亥子之間有大福慶權曰若終如言以君爲侯及立爲吳王範時侍宴曰昔在吳中嘗言此事大王識之邪權因呼左右以侯綬帶範範知權欲以厭當前言輒手推不受及後論功行封以範爲都亭侯詔臨當出權恚其愛道於己也削除其名範爲人剛直頗好自稱然與親故交接有終始素與魏滕同邑相善滕嘗有罪權責怒甚嚴敢有諫者死範乃髡頭自縛詣門下使鈴下入言未卒權大怒範因突入叩頭流血言與涕並權意釋乃免滕黃武五年範病卒

吳粲

按萬姓統譜粲烏程人仕吳爲曲陽長治有名蹟黃武初與呂範等拒魏將曹休於河口值天大風諸船纒絕軍多溺水攀粲船請援左右以爲船重必敗粲曰船敗當俱死爾奈何棄之所活者甚衆官至太子太傅

吳綽

按句容縣志綽素擅潔譽神鳳初採藥於華陽洞口見一小兒手把大珠三顆戲於松下綽見之因前詢誰氏子兒奔入洞中綽恐爲虎所害遂從入欲救之見兒化龍形一手握三珠填左耳中綽素剛膽以藥斧勵之落左耳而三珠已失所在龍亦不見出不十餘步洞門閉矣後上皇封綽爲素養先生

晉 吳畿

按晉書李炬傳炬伐氏齊萬年有殊功封東明亭侯還爲本郡督護太守宋胄欲以所親吳畿代之炬謝病去

吳隱之

按晉書吳隱之字處默濮陽鄆城人魏侍中質六世孫也美容善談論博涉文史以儒雅標名年十餘丁父憂每號泣行人爲之流涕事母孝謹及其執喪哀毀過禮與太常韓康伯鄰居康伯母每聞隱之哭聲輟飧投筯爲之悲泣旣而謂康伯曰汝若居銓衡當舉如此輩人及康伯爲吏部尙書隱之遂階清級解褐輔國功曹轉叅征鹵軍事兄垣之爲袁真功曹真敗將及禍隱之詣桓溫乞代兄命遂爲溫所知賞拜奉朝請尙書郎累遷晉陵太守在郡清儉入爲中書侍郎國子博士太子右衛率轉散騎常侍領著作郎尋守廷尉祕書監御史中丞遷左衛將軍隆安中爲龍驤將軍廣州刺史假節領平越中郎將清操踰厲元興初進號前將軍及盧循寇南海隱之率將士固守城陷爲循所得循表朝廷以隱之黨附桓元宜加裁戮詔不許遣還循拜度支尙書後遷中領軍義熙八年請老致事詔授光祿大夫加金章紫綬九年卒追贈左光祿大夫加散騎常侍

吳曠之

按晉書吳隱之傳盧循寇南海隱之長子曠之戰沒

古今圖書集成
吳延之

按晉書吳隱之傳隱之子延之復厲清操爲鄱陽太守

吳達

按晉書吳達傳達吳興人經荒饑疾病合門死者十有三人時達亦病篤其喪皆鄰里以葦蓆裹而埋之達夫婦既存家極貧窘晝則傭賃夜燒磚甃晝夜在山未嘗休止遇毒蟲猛獸輒爲之下道暮年成七墓十三棺時有賻贈一無所受太守張崇義之以羔鴈之禮禮焉卒於家

吳猛

按晉書吳猛傳猛豫章人少有孝行夏日常手不驅蚊懼其去己而噬親也年四十邑人丁義始授其神方因還豫章江波甚急猛不假舟楫以白羽扇畫水而渡觀者異之庾亮爲江州刺史遇疾聞猛神異乃迎之問疾猛辭以算盡請具棺服旬日而死形狀如生未及大斂遂失其尸

吳商

按萬姓統譜商字彥聲通經術徵爲東宮校書官至侍中